

Liebi Turnerinne

"Uf dere Welt gohts turbulänter zu als jeh, sigs de Brexit, de Trump oder au wettermässig.

Wieso ich grad jetzt uf das chumme? Vielleicht wel es mich, aber sicher au die eint oder anderi vo euch letztes Jahr emotional es bizzeli dureand gewirbelt hät.

Emotional darum, wel eus unverhofft e Krankheit, en Unfall oder susch es ischniedens Ereignis sigs i de Familie oder im Fründeskreis troffe hät und mer nüd dagegen händ chönne mache. So versuche mers mit positiven Gedanken, mit Dumedrücken und alles was mer süscht no händ, damit eusi Liebste oder mer selber baldmöglichst wieder ganz gsund werdet, oder dass mer schwierige Zyite guet überstönd unds wieder ufwärts goht.

"Turbulent" chunnt vom lateinisches "turbulentus" und bedüet au "unruhig", "ufgregt" oder "stürmisch".

Turbulent cha also au positiv si. Ufgregt im positive Sinn , wie Karin, wo für ein halbs Johr uf Reisen gange isch. Turbulent, für die wo das neue Feeling als Grossmutter erlebe dörfet. Ufgregt bim Entdecke vo neue Freizeitaktivitäte. Unruhig bi berufliche Veränderungen – au es bizzeli unruhig und ufgregt bi de Neuusrichtig vo eusere 2. Lebenshälfti.

So isch es nöd verwunderlich, dass au das Vereinsjohr prägt gsii isch vo verschiedene "Uuszyite", und ihr dorum nöd jede Donnstig de Weg is Altenburg gfunde händ um gemeinsam z'turne.

Doch trotz den "turbulente und stürmische Zyite" könnt ihr sicher si, dass am Donnerstig im Altenburg fleissig turnt wird, und ganz glich wie lang ehr euch e "Auszyit gönnt häd oder häd neh müesse", ihr sind jederzyit wieder herzlich willkomme um wieder dbii z'sii.

De "harti Kern" wo sich immer ganz verschiedene zämesetzt isch do und freut sich uf dich/euch!

Und so isch für das neue Vereinsjahr 2019 die schönste Perspektive, dass i turbulente und stürmische, aber auch i weniger ufregende Zyite mer eus wiiterhin am Donnstig treffed, zäme turned, zäme lached und d'Gemeinschaft pfleged und de turbulenten Alltag für kurzi Zyit vergesse chönnt.

Eure Liebeshwürdigkeit, eure Humor, eure Isatz und eues Lache sind für mich Elixiere, weli mich motiviered am Donnstig i de Turnhalle im Altenburg z'stoh.

Sie träge zum Zauber und e lockere Atmosphäre während em Turne bii. Dafür dank ich euch und wünsche eus allne es zauberhafts und gsunds neus Johr.

Renata

 *lichen*  
*Dank*